

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1645 del 29/05/2026

Manà fora su Trentino Tv l program l vegn endrezà dal Comun General de Fascia

“Pedies” : con en sabeda ai 30 de mé vegn fora la puntata #540 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 540. I argomenc de chesta puntata l é: Franz Dantone Pascalin l protagonist del liber nef de “Jent de Fascia”, Fiorenzo Perathoner ge à donà so patrimonie de filmac e testimonianzes storiches a la Majon di fascegn, i apuntamenc de la setemèna de l’Aisciuda Ladina festival del lengaz: l numer nef de la revista Gana e la raida per cognoscer zeche de più de toponomastica anter Ciampedel e Cianacei.

Franz Dantone Pascalin nasciù a Gries – Cianacei – del 1839 l é na persona che à fat la storia de la comunanza ladina de Fascia. L Istitut cultural ladin Majon di Fascegn, per fèr cognoscer la vita e l’anteveder de Pascalin l à endrezà l quinto liber de la regoeta “Jent de Fascia” con sie inom, apede ence n spettacol de teater portà dant enstadì.

Fiorenzo Perathoner per duta sia vita l à tout su tras telecamera momenc de vita de la jent de so paisc e de la val, coscita da poder aer l recort de coche l era n’outa. Dai egn ’50 inant l à metù ensema sacontenc filmac che anchecondì l é testamonesc de cultura e de l’evoluzion de la sozietà fascèna. Fiorenzo ne conta de sia vita e de coche, per tegnir su e valorisèr sie prodoc, l ge à donà sie patrimonie dal gran valor storich al Istitut cultural ladin Majon di Fascegn.

Va inant i apuntamenc de l’Aisciuda Ladina festival del lengaz: L é stat prejentà te ciasa de la Moniaria a Sèn Jan l numer 29 de la revista ladina Gana, dedichèda a la eles. L’edizion 2026 col titol “Dalong ma ampò davejin”, ge dèsc lèrga e porta dant stories e esperienzes de femenes ladines che vif e laora foradecà da l’Arabia, a l’Australia ai paijes de l’America Latina e fora per dut l mond.

N’altra raida per cognoscer nosc raion e i inomes di lesc: da Ciampedel a Cianacei, passan fora per la viles de Pian e Soracrepa, col menatroes Nicolò Cincelli. N bel grop de jent ponté via da Ciampedel é ruà fin sun Pian, do l percors del troi di ladins che l va en ite a mesa costa, se à passà fora l Bosch da Ronch, Salecei, la Crepes de Vareles, ruan enfin sora la cèses de Gries.

I reports de chesta setemèna i é stac enjigné e porté dant da Riccardo Zanoner e Angela Pederiva.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN**- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program l va fora ence su AltoAdige TV – canal 11 Prov. de BZ - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

La puntata de chesta setemèna la vegnarà fora entorn la medema ora de la televijion.

Se pel veder i report un a un su la piata Facebook de TV Ladina.

<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)